

En memoria da

Marili Groth, Sedrun

Gia dad in temps enneu era ei enconuschent che la Marili Groth haveva da far cun la sanadad. Meinsvart stu-eva ella serender el spital. Ella sere-vegnea denton spert. Puspei a casa, fageva ella cun premura il percasa ed ella mava sco ina perla per las vias sco'sche nuot fuss schabegiau. Den-ton la malsogna maligna da nos dis ha buca schau luc entochen ch'era la Marili ha stuiu suttacumber, malgrad sia energia da fier. Ils 23 da settember eis ella vegnida levgiada da sias do-lurs ed ha astgau entrar ella patria ce-lestiala.

Marili Groth-Tschümperlin ei na-schida ils 18 da fenadur 1911 ad Arbon nua che ses geniturs fagevan ils ustiers. Cura ch'ella ha 4 onns, se-renda la famiglia a Tavanasa. Leu-la-vura il bab sco cramer e la mumma sco survigiladra dalla barriera dalla



viasier. Suenter 11 onns ha ei puspei giu num bardigliar, damai che la mumma era daventada caustaziun a Sedrun ed il bab survigilader dalla viafier Furca-Alpsu, avarta 1926. Quella partenza da Tavanasa ha la Marili fatg cun larmas els egls, sesen-teva ella gie dacasa a Tavanasa. Den-ton, il mal ei prest tschessaus, havend gleiti anflau contact culs Tuatschins. En quei grau haveva la Marili buca difficultads, era ella gie adina curte-seivla e dalla luna. Quei spért da hilari-tad semuossa era enten nudar sgnoccas e canzuns en in carnet, dal-las qualas ella fageva diever cun caschun.

Suenter la mort da sia mumma 1938 surdat la direcziun dalla viafier Furca-Alpsu alla Marili il post da causta-ziu a Sedrun. Ina plazza da gronda responsabludad ch'ella ademplescha denton cun tschaffen e cumpetenza entochen 1944. Naven da lu ha siu mariu, Carli Groth, remplazzau ella entochen sia pensiun 1976. La Marili denton daventa ina consorta e mumma exemplarica. La famiglia munta per ella tut. Veggend ella mal-sauna, ha ella perquei fatg il pli vess da buca saver survir als ses sco quei ch'ella vess fatg bugen. Tochen la fin da sia veta sperava ella da serevegnir per puspei esser a disposiziun als da-casa silmeins per in tempset. Denton ei ha buca duui esser. Malgrad tut ha ella giu ina biala mort, sentend la gronda carezia da sia famiglia e l'atta-schadadad da numerus convischinis e convischins che han visitau ella. Quei spért da cuminanza ch'ella ha viviu e ch'ella ha astgau retscheiver specialmein la fin da sia veta duei era esser per nus in muossavia!

N.B.